



Republika e Kosovës
Republika Kosovo-Republic of Kosovo
Kuvendi - Skupština - Assembly

Legjislatura V
Sesioni vjeshtor

Seanca plenare e Kuvendit
S-045
Prishtinë, më 2 nëntor 2015,

PROCESVERBAL

**I SEANCËS PLENARE TË KUVENDIT TË REPUBLIKËS SË KOSOVËS,
E MBAJTUR MË 2 NËNTOR 2015**

Seancën e drejtoi Kadri VESELI, kryetar i Kuvendit, ndërsa i ndihmoi Xhavit HALITI, nënkryetar i Kuvendit.

Kryetari i hapi punimet e seancës plenare, sipas rendit të ditës, të përgatitur nga Kryesia e Kuvendit, në marrëveshje me kryetarët e grupeve parlamentare.

Ai procedoi me pikën e vetme të rendit të ditës:

1. Shqyrtimi i Projektligjit për ratifikimin e Marrëveshjes së Stabilizim-Asociimit ndërmjet Kosovës, në njërën anë, dhe Bashkimit Evropian dhe Komunitetit Evropian të Energjisë Atomike, në anën tjetër

Kryetari e ftoi përfaqësuesin e Qeverisë së Kosovës që para deputetëve të Kuvendit ta paraqesë dhe arsyetojë Projektligjin për ratifikimin e Marrëveshjes së Stabilizim-Asociimit ndërmjet Kosovës, në njërën anë, dhe Bashkimit Evropian dhe Komunitetit Evropian të Energjisë Atomike, në anën tjetër.

Ministri i Integritimeve Evropiane, z. **Bekim Çollaku**, tha se Marrëveshja e Stabilizim-Asociimit me Bashkimin Evropian paraqet hapin e parë dhe më të rëndësishëm të ndërmarrë deri më tani në rrugëtimin e Republikës së Kosovës drejt Bashkimit Evropian.

Përfitimet nga kjo marrëveshje për qytetarët dhe për rrugëtimin e integritimit evropian të vendit tonë nuk përfundojnë me të hyrë në fuqi kjo marrëveshje, përkundrazi do të jetë hyrja në fuqi

momenti kur do të fillojë puna e vërtetë e integritit të vendit tonë dhe në fazat e mëvonshme do të manifestohen edhe përfitimet konkrete nga kjo marrëveshje.

Pse po e bëjmë këtë marrëveshje me Bashkimin Evropian?

Vlerat e Bashkimit Evropian janë vlera të cilat qytetarët e Republikës së Kosovës i kanë përqaftuar me kohë. Janë vlera të cilat qytetarët e Kosovës i konsiderojnë si vlera të tyre. Marrëveshja për Stabilizim-Asociim i ngërthen në vete të gjitha ato vlera.

Marrëveshja e Stabilizim-Asociimit është rezultat i një procesi të mirëfilltë dhe një negociimi të kujdesshëm nga të gjitha institucionet relevante.

Me qëllim të koordinimit të procesit negociator, Qeveria e Republikës së Kosovës, më 27 shkurt 2013 e ka formuar ekipin negociator dhe grupet punuese negociatore.

Negociatat kanë filluar më 28 tetor 2013 dhe përgjatë gjashtë muajve negociatash janë mbajtur tri takime në nivel të kryenegociatorëve dhe dhjetëra takime në nivel të grupeve punuese.

Negociatat përfunduan më 2 maj 2014, ndërsa më 25 korrik 2014 u vendosën inicialet fillestare në dokumentin e negociuar.

Më 22 tetor 2015, Këshilli i Bashkimit Evropian e miratoi MSA-në dhe më 27 tetor 2015 ajo u nënshkrua. Periudha e zbatimit të MSA-së është 10-vjeçare, ndërsa rishikimin do të mund ta bëjmë pas pesë vjetësh.

MSA-ja përmban katër pjesë kryesore: çështjet politike, përafrimi i legjislacionit, politikat e bashkëpunimit dhe çështjet tregtare.

Nga këndvështrimi politik, MSA-ja i ka avancuar marrëdhëniet tona me Bashkimin Evropian, nga një marrëdhënie deklarative politike dhe e vullnetit të mirë në një marrëdhënie kontraktuale me të drejta dhe obligime për të dyja palët nënshkruese.

Me nënshkrimin e MSA-së, Kosova e ka filluar rrugëtimin zyrtar drejt anëtarësimit në BE. Në kuadër të MSA-së, BE-ja merr obligim ta realizojë perspektivën evropiane të Kosovës, duke e integruar Kosovën me Bashkimin Evropian në harmoni me kriteret e Kopenhagës

Nga këndvështrimi ligjor, MSA-ja ndërmjet Kosovës dhe Bashkimit Evropian ka bazë të njëjtë ligjore sikur MSA-ja e të gjitha vendeve të rajonit.

MSA-ja është negociuar në bazë të nenit 218 të traktatit të funksionimit të Bashkimit Evropian. Kjo bazë ligjore përcakton që Bashkimi Evropian mund të lidhë marrëveshje ndërkombëtare me shtete të treta.

Republika e Kosovës ka marrë përsipër ta përafrojë legjislacionin ekzistues dhe legjislacionin e ardhshëm në mënyrë graduale me tërë legjislacionin e Bashkimit Evropian.

Në fazën e parë, rëndësi do t'i japim përafrimit të legjislacionit bazë të Bashkimit Evropian në fushat e tregut të brendshëm, aspektet tregtare dhe natyrisht edhe në fushën e sundimit të ligjit.

Nga këndvështrimi ekonomik, MSA-ja do të ketë një varg të efekteve pozitive.

Fillimisht duhet nënvizuar se MSA-ja synon krijimin e zonës së tregtisë së lirë ndërmjet Kosovës dhe Bashkimit Evropian brenda 10 vjetëve, sa do të zgjasë zbatimi i saj.

Nga hyrja në fuqi e MSA-së do të mundësohen, në njërën anë, qasja e plotë e produkteve të Kosovës në Bashkimin Evropian dhe, në anën tjetër, liberalizimi gradual, po specifikoj - liberalizimi gradual i tregut të Kosovës për produktet e Bashkimit Evropian.

Liberalizimi i tregut ndërmjet Kosovës dhe Bashkimit Evropian do të ndikojë drejtpërdrejt në rritjen e konkurrueshmërisë së ekonomisë tonë, që do të ofrojë shërbime më kualitative, produkte më të mira dhe çmime më të lira për qytetarët tanë.

Në tërësi, MSA-ja do të ndikojë në ristrukturimin e ekonomisë sonë, rritjen ekonomike dhe në zvogëlimin e papunësinë.

Unë vlerësoj se ratifikimi i Marrëveshjes së Stabilizim-Asociimit është ngjarja më e rëndësishme që ka ndodhur në Kuvendin e Republikës së Kosovës që nga shpallja e pavarësisë sonë.

Kryetari e hapi diskutimin.

Në emër të Komisionit për Integritet Evropian diskutoi Seuta Sahaqija; në emër të Grupit Parlamentar të PDK-së, Adem Grabovci; në emër të Grupit Parlamentar të LDK-së, Ismet Beqiri; në emër të Grupit Parlamentar të LVV, Glauk Konjufca; në emër të Grupit Parlamentar të AAK-së, Donika Kadaj-Bujupi; në emër të Grupit Parlamentar të LS, Slavko Simiq; në emër të Grupit Parlamentar “Nisma”, Valdete Bajrami dhe në emër të Grupit Parlamentar “6+”, Kujtim Paçaku, si dhe deputetët Ilir Deda, Vjosa Osmani, Alma Lama, Muhamet Mustafa, Luljeta Veselaj-Gutaj, Bekim Haxhiu, diskutimet e të cilëve janë dhënë të plota në transkript.

Në fund të debatit, ministri i Integritetit Evropian, z. Bekim Çollaku dhe kryeministri i Republikës së Kosovës, z. Isa Mustafa i falënderuan deputetët e Kuvendit për kontributin e dhënë, si dhe i ftuan ata që ta miratojnë Ligjin për ratifikimin e Marrëveshjes së Stabilizim-Asociimit ndërmjet Republikës së Kosovës dhe Bashkimit Evropian.

Kryetari i njoftoi deputetët e Kuvendit për procedurat e miratimit të Ligjit për ratifikimi të marrëveshjes (me një lexim), përkatësisht nevojiten së paku 80 vota “për” për miratimin e tij.

Pastaj, kryetari e hodhi në votim amendamentin 1 të Komisionit Funkcional. Kuvendi me 85 vota “për” e miratoi amendamentin nr. 1.

Në fund, kryetari e hodhi tekstin e projektligjit me amendamentin e miratuar.

Në sallë ishin të pranishëm 87 deputetë.

Rezultati i votimit ishte si vijon:

Për ----- 86,
Kundër ----- 0,
Abstenime ----- 0.

Kryetari konstatoi se Kuvendi mori këtë:

V E N D I M

1. Miratohet Ligji nr. 05/L-069 për ratifikimin e Marrëveshjes së Stabilizim-Asociimit ndërmjet Republikës së Kosovës, në njërën anë, dhe Bashkimit Evropian dhe Komunitetit Evropian të Energjisë Atomike, në anën tjetër.

2. Ligji i dërgohet për shpallje Presidentes së Republikës së Kosovës.

Kryetari i mbylli punimet e seancës plenare në orën 12:12 minuta.

Kryetari i Kuvendit

Kadri VESELI

E përgatiti:

Drejtoria për Çështje Plenare dhe Procedurale